

延慶縣志

程芳辰題



延慶縣志卷之九

藝文一

蓋太上立德其次立功其次立言文固國之華也邊陲雖無足以當文物盛地然昭臣紀則有疏奏勒勳猷則有碑記頌懿德則有序文以至宦遊僑寓墨士騷人即事感時留題賦景皆足以識一時之文獻者雕龍繡虎之裁安可俾致之堙沒也作藝

文志

舊志

查處重鎮武備疏略

明胡效才

臣伏見昌平州天壽山一帶地方迺祖宗陵寢所在而畿輔要害最先比之他鎮爲尤不可不嚴而其將領之選比之他鎮爲尤不

延慶縣志

卷之九 藝文

可不精也累朝曾置長陵等七衛官軍每衛無慮數千員名而又專設內外守備各一員以居守之臣頃巡關先入其境時方四月尙未聞操查見在官軍不及三分之一軍士見在者止守門巡捕數十名而已其餘營操旗軍更無一人應命守備而下展轉支吾或曰在京打卯或曰出差未回或曰巡山不在臣等推究其廢弛之故大抵糾察不專而人心怠玩奸弊日滋而法守不立之所致也爲今之計莫若專官以肅其觀聽委任而考其成功如蒙勅下該部查訪合無今後天壽山一帶武備事宜於巡視東西兩關御史定擬一員常川往來專一督察及推選練達知兵實心幹事將官一員前去接管守備更望天語叮寧戒飭太監劉岑自今伊始



務要恪遵勅旨及見行事例留心戎政痛改前非其撞道紅門等口逼近四海冶衆賊出沒去處邊墻林木尤宜加謹防備多方保護事干地方軍首應行應革重務俱與外守備官從長計議而行如再偏私執拗懈惰不職聽臣等撫按官指實奏聞

議處隘口以重屏蔽疏略

鄭芸

竊惟關隘之設大則關城小則堡口守以官軍聯以墩臺遇有警報各守其險遠近內外勢實相倚臣奉命前往該關巡視自八達嶺出岔道堡經由懷來地方至火石嶺而入閱視橫嶺等口由外以觀內歷覽其要害則見八達岔道勢相連屬八達則軍人全備營房城垣無不可守岔道則城垣軍少全不足恃至於火石嶺等

延慶縣志

卷之九 藝文

二

口軍止三四名器械無一件隨據居庸關分守官稱關外堡口不但岔道火石嶺等處坍塌如是白羊口山外懷來衛地方原有端雲觀棒椎峪東棒椎峪西羊兒嶺大山小山及火石嶺凡七口居庸關東路山外永寧衛地方原有大紅門小紅門柳溝塔兒峪西灰嶺東灰嶺火燒嶺井泉韓家莊謊砲溝張家口凡十一口俱各大壞盡坍塌先年白羊等處失事根因實在於彼臣不勝驚駭但地方非臣該管廢弛又經年久難更查究爲今之計宜照巡視居庸等關事例專給勅一道付彼處巡按御史或暫另差一員嚴督各該衙門將關外各隘口通行修理撥軍守把及照懷寧地方以南紫荆倒馬關之西一帶直至故關等處關外各隘口不係臣巡視

地方者俱各查處專勅彼處巡按御史兼管巡視庶責成專而綜理周密外隘固而關是恃矣

固藩籬疏略

王士翹

臣同兵備副使艾希淳徧詣居庸關隘閱視八達嶺城四望郊外人烟稀少半里內有地名盆道堡係隸隆慶州民居輳集大約千有餘人家路通宣大往年雖建有土城而卑矮可踰傾圮過半雖設巡檢而弓兵不過二十餘名雖協守以壯夫而往來不常緩急莫倚臣愚以爲居庸京師之門戶盆道居庸之藩籬委盆道而不守是棄藩籬然欲守此非城不可非兵不能又查得永寧縣城相去岔道四十餘里往年因其近邊特於本城建立兩衛又於居庸

延慶縣志

卷之九 藝文

三

關內隆慶衛所輪撥指揮一員千百戶五員統率軍士二百五十名備禦永寧夫永寧既有兩衛官軍又有叅將守備等駐劄而猶必藉於居庸區區數卒耶蓋因先年黑峪有警權調防守其後年久遂以爲常夫永寧岔道均重今若掣改備禦永寧官軍備禦岔道亦豈待加兵而後足乎在岔道免茶藥之害在居庸護藩籬之固在京師有盤石之安財不甚費兵不加增一舉而三利存矣

請築堡以固關隘疏略

曾佩

臣巡視居庸等關頃以宣大傳報聲息臣會同巡撫都御史孫應奎駐劄居庸關以便調度策應臣復自該關出入達嶺外前去巡訪敵騎由來之路第見八達嶺外不一里許有岔道堡者乃該關

軍民雜居貿易久而成聚大約千有餘家生聚頗繁畜產頗盛四
周雖羅以土墻卑矮可踰敵若登坡臨下雖賁育莫禦臣切憂之
蓋岔道此堡適當八達嶺之口居庸關之藩籬如欲敵之絕意於
居庸必先使之無垂涎於岔道未有岔道危而八達無事居庸不
震者驚也若居庸震驚則京師畿輔不卜可知故臣深計岔道之
地不可少忽

申飭種樹疏略

房楠

查得先該巡撫順天劉應節又該巡撫保定溫如璋題前事復將
樹栽奏准補價將銀二千餘兩解貯遵化縣庫祇緣他務相妨遂
致遷延未舉臣今至邊即相其地形詢諸輿論大都有七利何爲

延慶縣志

卷之九 藝文

四

七利三載成林敵入犯不能齊驅一利也俟其半入或以短兵相
接以火器交攻二利也遇敵不逃撼之不動即添數萬甲兵三利
也內有敵臺外有多樹敵踰重險必延日時而我策應之兵至矣
四利也葉落可以供爨果實足以充饑五利也且一旦窮塞變而
樂土孰肯逃去六利也邊樹邊墻交相爲守而主兵若復練焉其
勢似可支持入衛之兵料可議減七利也巡撫劉都御史方在舉
行而臣復冒昧塵瀆期於必行邊方幸甚

請建空心臺疏略

譚綸

議照禦戎之策惟在戰守二端故必以戰則必勝以守則必固除
戰勝之事別有成議外臣等謹以薊昌之守言之東起山海關西

止鎮邊城地方綿亘擺守單薄故臣等以謂必設二面受敵之險將塞垣稍爲加厚二面皆設堞口計七八十堞之間下穿小門曲突而上而又於緩者則計百步衝者五十步或三十步即築一墩如民間看家樓高可一倍高三尺四方共廣一十二丈上可容五十人無事則宿于臺更番瞭望有警則守墻者附墻守臺者固臺而臺之位置又視其山之形勢參錯委曲務處臺於墻之突收墻於臺之曲突者受敵而戰曲者退步而守所謂以守則無不固也以臺數計之率每路該增墩臺三百座薊昌二鎮今分爲十二路其增築墩三千座每一臺必給官銀五十兩通計費銀一十五萬合無乞勅戶兵二部每歲動支銀五萬兩解送臣應節處分發興延慶縣志

卷之九 藝文

五

工大約每歲務完築墩臺一千座三年限以通完其加厚邊墻添設內堞則聽臣等便宜而行每歲仍聽臣等與巡關御史將完過工程備查有無堅固堪備守禦及各文武大小當事諸臣勤惰之狀分別奏請加賞罰以示勸懲如此則邊有磐石之固陛下無北邊之憂矣

復學疏

國朝李應薦

題請復學以廣皇恩以育人才事准直隸撫臣于移會前事移據原任口北道叅議王隲呈詳據懷來衛永寧衛歸併延慶州學生員王灝王承憲等又據保安衛歸併保安州學生員張問明等呈稱懷來永寧保安三衛密邇神京皆聲教文物之地自前朝以迄

國初莫不設學育士以故人文蔚起科不乏人後於順治十六年內奉旨裁併小學遂將懷永二衛學歸併延慶州學保安衛歸併保安州學兩州童生雖援大學之例不過取入十五名人多額少功名之途母既隘讀之志多灰且裁併之後延慶州廩生五十名保安州廩生四十名而猶遵州制三年兩貢之例計自補後非七十年不能出貢人壽幾何堪此沉滯多士幸生聖朝右文之時而無復上國觀光之望可爲隱痛查當日裁官原爲汰冗員起見今順天昌平州教官兼攝延慶衛學務如比照此例以延慶保安兩州教官兼攝懷來保安永寧三衛學務可不煩更爲設官而士子已廣沐教化矣况眞定府阜平縣學先經歸併曲陽行唐二縣自

延慶縣志

卷之九 藝文

六

康熙二十二年三月內已蒙皇恩復設有例可援懇乞轉詳撫學兩院題請復學庶生員不致白首窮經而童子亦幸青雲有路爲此合詞具呈等情到道該本道看得人知向學士知尊師此最盛之治象今懷來永寧保安三衛自裁併後童子入學減額諸生出貢無期揆以公情殊可矜憫合無如其所請以學正住州訓導住衛庶無設官之煩收得士之效等因到院據此爲照興復已裁之衛學作養邊徼之生儒一轉移間而官無冗員士有生色誠屬可行但保安衛學歸併保安州者似可援延慶州例將學正住州訓導住衛其懷來永寧二衛學歸併延慶州者應否以延慶州學正住州訓導移住懷來衛學兼董永寧衛生儒事關文教擬合移會

定議會疏具題以廣皇仁以光文治等因移會到臣該臣看得宣鎮地方寒苦士子讀書殊爲艱難臣奉命兩行考試見其生童衣冠樸敝生計淡泊然猶孜孜力學有志上進是誠皇上右文重道感化深廣所致也似宜因其鼓舞予以廣勵至于生員暮年出貢未必人人得官然比照各處貢例一視同仁亦足以慰皓首窮經之望又查現行事例順天府屬密雲縣教官兼攝密雲衛學務昌平州教官兼攝延慶衛學務則懷來永寧保安三衛或令延慶保安二州教官兼攝復學而不必添官揆之事理似爲兩便臣仰見我皇上培植文風加意作人無所不至謹會同巡撫臣于成龍合詞具題伏祈皇上勅部議覆施行

延慶縣志

卷之九 藝文

七

居庸關論

明王士翹

居庸兩山壁立巖險聞於今古蓋指關而言愚謂居庸之險不在關城而在八達嶺是嶺關山最高者憑高以拒下其險在我失此不能守是無關矣逾嶺數百步即岔道堡實關北藩籬守岔道所以守八達嶺守八達嶺所以守關也由八達嶺南下關城眞所謂路若趨井者關北門外即閱武場登場而望舉城中無遁情況往來通衢道路日闊雖並車可馳故曰險不在關城也關東灰嶺等諸隘口外接黃花鎮內環寢陵更爲重地經畫猶或未詳關西白羊口號稱要害城西門外去山不十丈而山高於城數倍岡坡城漫可容萬騎敵若據山則我師不敢登城拓城以跨山今之急務

也長峪橫嶺通近懷來均之可慮而橫嶺尤孤懸外界山高泉涸軍士苦之鎮邊城雖云腹而喉舌地川原平曠無險阻之固兩霽溪漲潦沒頻仍越此而南即長驅莫遏矣是故鎮邊之當守其形難察也此固一關險夷然去京師咸僅百餘里耳門戶之險甚於潼劍設大將屯重兵未雨徹桑之謀其可一日不講哉

防守要害論

許綸

宣府山川糾紛地險而狹分屯建將倍於他鎮是以氣勢完固號稱易守然去京師不四百里鎖鑰所寄要害可知北路獨石馬營一帶地雖懸遠然長阻長安嶺敵雖徑下中路之葛峪大白羊青邊諸堡西路之柴溝洗馬林萬全諸城南路之東西順聖皆稱敵衝警屢至焉東路永寧四海冶及龍門所則三衛窺伺之地而四海冶上通開平下連橫嶺又要地矣易曰王公設險以守其國今考塞垣所據險亦幾盡第時異勢殊有不可不爲之經畫者若曰補長裕城鎮邊城之募軍重浮圖峪插剪嶺之防守留茂山衛京操之士以益紫荆李信屯交界之堡以固兩鎮此豈容已乎

山谿論

前人

古神禹之敷土也奠高山大川以爲地紀而民居安國用阜萬世賴焉上谷時爲冀州北境其貢賦在夾石碣石入河之列蔡沈傳已可考見然其境內山川足以安民阜用非地紀中紛錯者耶余今觀之山脉西至恒嶽發綿亘而東者曰石門曰九宮曰樊曰縉

曰白羊口曰傍水峪是鎮之前屏也東至開平氈帽山發綿亘而西者曰馬鞍曰饅頭曰埜狐嶺是鎮之後屏也水源東自隆慶海沱發折而西南至懷來東方者曰媯自永寧團山發折而西南至懷來東南方者曰溪西北自境外發流而經柴溝鎮城至保安者曰洋西南自靈邱莎泉發流而經蔚經宏至東順聖者曰滋是鎮之左右界也山以居庸爲望而前屏若肩後屏若背同翊乎大行水以桑乾爲會而左界若迎右背若送同趨乎滄海則其風氣完固信無踰于屏界之中矣而涿鹿建都上谷置郡以至重鎮今設要皆有取焉是故才之沉毅于是乎生物之蕃盛于是乎殖兵之屯戍于是乎增官之職守于是乎備民居安國用阜所利賴於山川者宏也雖然固國之道不以山川賢聖有明訓矣舉以告諸司境焉可乎

延慶縣志

卷之九 藝文

九

東路志總論

孫世芳

按本路之邊自火焰山至靖安堡一隅耳未歎時軍門總三鎮之兵撫鎮道傾全鎮之力以計安東路顧有甚于鎮城與各路者豈非以距京陵爲近若謂東路安則南山之南舉安也哉曾不思敵何由而至東路也是必沿邊不守縱之深入也不預守沿邊與各路使無深入乃竦縱之入而後併力一路焉計亦舛矣况叅將援兵按經制所載二千二百有奇馬騾一千四百五十四匹頭各城堡之官兵六千四百四十餘員名馬騾一千七百餘匹內除塘撥走

遞四百九十餘匹外尙有一千二百餘匹頭加以本路遊兵二千二百名馬騾一千四百五十匹頭時揀而歲練之尙不足以支一路之應援乎惟是承平日久軍士稍覺萎靡近又苦於援遼挑選不易召補居常無事則烏合卒遇有事則獸駭是合之而來虛糜常餉駭之而去空飽邊粟有衆若此將安用之近雖稽查揀汰務期實濟然文告虛聲不過稍比於各路已耳此固懷隆兵備雖三經議裁而必三議復之誠念重地終不可缺者也至於市井多亡命之徒衙門滋黨結之利墟落潛流徒之奸部伍多耗削之弊每見殊於他鎮所最當設法整飭之者也若謂疏合河口以輓蘆溝之運聯黑山頭以續薊鎮之邊應俟後來今固未可輕議焉

延慶縣志

卷之九 藝文

南山志總論

杜齊名

南山者東路之南也東路之南則腹裏矣乃亦聯城列成以爲邊者以其一帶之邊爲防護山陵耳夫各路不守而後急東路東路失據而後急南山南山急則本城何爲哉據邊東起四海冶之火焰山西抵懷來南之合河口無論斷崖削壁幾二百餘里即本地爲墻者亦百二十餘里矣又南北適與昌平相對待而共表裏故所謂大小紅門東西灰嶺則皆蔽山陵之前以名之者也爲營城二十四爲寨九爲樓百有八十爲臺又百八十八腹背相依守者不患無險矣參將所轄守操千把總以及坐營官兵各備焉首尾聯絡守者不患無將矣顧額軍前不具論就今經制所載六千五

百有奇馬騾駝總之不下九百九十三匹頭中間除塘撥走遞外
尚有六百四十餘匹頭近雖迫于援遼軍馬挑選之苦所存者倘
無虛冒一墻之外別無分土專力乘障邀擊非所事也耶沿邊如
海子口謊砲兒韓家口灰嶺柳溝大小紅門等處最稱衝要防禦
尤宜加意焉火焰山之旁所不接薊鎮之邊者桃樹庵百丈墻耳
往時三鎮推諉經數十年無肯任者非難於墻爲難於守也近倚
宣鎮完局矣然臨事必三鎮共力同心庶幾無失萬一可虞詎可
獨責宣鎮乎

延慶縣城記

明林廷舉

易曰王公設險以守其國禮曰城池以爲固春秋尤謹城築備書以示得失亶以城乃禦暴保民之所爲政者宜盡心也矧邊城攘夷安夏之攸繫爲尤要哉距居庸北有州曰延慶相傳建自金元沿革湮沒無徵永樂甲午太宗皇帝巡狩北邊駐驂團山以斯地厥土曠沃羣山環峙遂創州治遷民以實地命官以蒞民幾四十餘年矣於是今明皇帝篤紹前烈申諭將臣嚴飭邊務時鎮朔大將軍昌平侯楊洪副總兵右都督紀廣戶部左侍郎劉璉叅將都督同知楊能都督僉事楊信巡按監察御史鄭詔僉謂是州拱衛京師控制朔漠誠爲要害城可無乎會知州胡璉惟圖保障適以

延慶縣志

卷之九 藝文

一一一

狀申諸公遂請於上可其奏且勅副總兵紀廣專董厥事諸公共承明命殫知畢慮協力一心紀公尤圖仰答朝廷委任至則正方位平版幹稱畚築議遠邇以均勞度有司以計工夙夜勤勩罔懈右參將楊公躬率甲兵往來以備不虞於是士卒八千人樂於趨事經始七月初二日興工八月初五日繚垣深塹巍堞重門煥乎一新復建麗譙以司昏曉新門額以聳觀瞻南曰奉宣北曰靖遠東曰致和屹然金湯之固誠北門之屏翰也旣成求紀其事惟成周有獫狁之警請王命以城朔方東方之城仲山甫以上卿往臨其役故詩云天子命我城彼朔方又云王命仲山甫城彼東方今諸公以保民禦侮爲心茲城是請皇上重勞人力賢能是任其周

人城朔方命山甫之意歟况紀公恪共乃事今春嘗城雷家站甫一月而百堵皆興今復成此豐功皆可書也遂紀歲月顛末俾後有所考徵且昭列聖之恩諸公之德紀公之功於無窮焉是爲記

延慶縣學記

葉盛

延慶縣學創自洪熙改元蓋從知州楊賓請度地城東南隅初甚湫隘正統九年有修葺之舉未備也逮天己巳歲敵馬犯塞民且弗與守况學乎猶幸弗燬於兵然日就頽廢矣成化丁亥知州秦州李轟自陳州同知陞秩來蒞事曰弊邑雖邊小去首善之地纔百里教有弗興吾政有克行之者乎請於上官旣報可即撤其舊而圖新之堅其土築高其垣蔽晝思夜惟悉力興復之事旣而屹

延慶縣志

卷之九 藝文

三三

黎小子耆老退校皆響慕相率來相之城中軍將暨懷來永寧守鎮重臣偉其爲亦樂助之民有姚祿者偶發地得白金一器以兩計五十有奇願不私已亦有以資之於是廟則先就兩廡櫺星戟門相次如式後從事於學明倫有堂講肄有齋神有厨庫師有公廨士有號舍庖滷亦旣備已會予適自上谷赴召還學正徐旭訓導金璧耆老諸生至居庸北塞踰陳道左以記爲請雖諾之未暇爲也國子生黃端張榮等日來速記率爲之記曰四代之學邈矣後世之所謂學養士誦習焉爾蓋亦曰處而明乎古聖賢之道他日出而行乎古先聖王之政教所謂化民成俗昔人之遺意未泯焉夫隆慶之名則因近代之龍慶近代號稱盛德守文之主固

出隆慶其爲善地可知茲一修學而齊民知義其感化之敏風俗之媿如此則其產之良又可知州有官學亦有官皆民之表也官有弟子員又民之秀也上下之相承政教之相及而不有思可乎民未化也俗未成也猶必資夫學矧聖朝文德之盛涵煦之深歷年之久上必有教焉下必有效焉自都邑而達之於野家無不順里無暴慢公無負逋頽白之人無負戴老老長長父父子子人知禮義士習文武彬彬焉出爲時用使陰山之北皆知所化服而居庸之重關擊柝以防其險一若無所爲者以成化於億萬年無疆之休斯則學之有成而有以副吾徒疇昔之望斯實今天子宵旰惓惓之心也予不敏嘉與若等俟觀焉是爲記

延慶縣志

卷之八 藝文

一四

重修城隍廟記

劉龍

予友張君信夫出守隆慶下車謁所謂城隍廟者見其頽敝弗稱即有志脩葺顧其時未可越二載政治民頌歲且大熟乃捐俸購材民欣然各以資助子來趨事不數月落成遣使至京師請記予惟大道旣隱天下爲家王公設險以守其國而城郭溝池以爲固民之所聚不能無衛其來久矣築而高者吾知其爲城濬而深者吾知其爲隍其爲神者固不可知也有國都有郡邑即皆有城有隍亦即有神屋而祠之衣冠而肖之俎豆而薦之洋洋乎如其上如在其左右果孰爲之爾耶至其有禱輒應有約者要以爲質不得其平而鳴號呼赴愬若甘心就殞其禍福人蓋往往不爽雖

婦人童孺之愚亦凜然憚之夫其高且深者民日相與出入往來其間未見所以異也命之爲神顧烈烈如是其必有不依形而立不假物而存超然獨出於人之所不可知者耶凡國都郡邑之建必卜其地之吉者其氣必靈會陰陽之和鍾山澤之秀適物產之宜於是爲城爲隍以奠民居胥以寧其始建迄今百千年主其地運其功用物則宏取精則多爲神有必然者繫之城隍重民居也人心淑慝不能自掩而常怵於禍福理之所在氣亦隨之潛孚默會若有司焉者顧瞻其居其城隍之神乎神不專於城隍城隍而爲民設足以當之其昭於天下也有由然矣神不可知而爲民崇信如此以其道聰明正直爲一耳况爲之牧者儼然臨上民皆望而見之慶賞刑威出其掌握苟行之以聰明正直而不二其德其崇信不尤甚矣哉故民牧之賢隨其所在即與城隍伍端君點檢不敢有意於職惴惴若爲爲神羞政有不善民有不安者乎繕祠宇修祀事自恒情視之若無大關其心舍常新不爲物滓通於神明用其道以臨民與之伍不爲之羞從可識矣彼肆焉者付之茫昧恣意無忌於此盖不暇及若張君其信賢遠乎人哉其規制之宏雕繪之美視舊不啻加倍固人所共見者予可略云

知州李君政績記

張泰

成化十二年六月延慶知州李君爲州旣九載將朝京師浙江按察司副使聶君益之州人也適以內艱在里州軍民父老感君者

群謁於益之謀所以紀君政績於不朽益之不自文乃述君行能之實致書屬予文益之予同年友中之明偉慎許可者其命不可拒且時郡邑吏多爲矯爲隨以干時譽者一有誠心爲善政而民不能忘又奚可不書而揚之也按所述君名彙字廷器陝右秦州人正統九年由州學生員於鄉遂游胄監稱老成學者景泰七年九月入吏部選授河南陳州同知政修民戴長吏旌其能九載得勅命嘉獎陞知隆慶隆慶畿北險要地境左右連二二軍衛兵民叅集爲訟爲盜者日紛然干於州君一以法平之不公其民不惡其兵而奸盜帖息殊異往者先是州無額設祇候人及馬夫官得以濫補而利其供饋君白於巡撫憲臣請所宜得允之乃定爲祇

延慶縣志

卷之九 藝文

一六

候者四人給公餼馬夫十戶執牧秣外此門無密遣家無私役會民時或歉則借盈卹虧撫循有方異時流移者咸樂歸農乃復爲之營置田具牛畜穀種分給之於是州無遺田戶數復增理民之餘於廢墜當舉者罔不盡心州學自正統乙巳罹兵燹廟貌僅存而日傾圮吏鮮務作興者益之嘗謂君學宮能因舊飭新吾黨之士茲幸君至相度以爲非改建不可乃大勸於州之羣僚宦家暨殷實民舉助工而懷來永寧諸鎮帥亦樂捐其資再越年而廟學煥然完外閎壯無讓大郡士欣游習而民不知費葉文莊公爲巡撫時嘗喜而爲之作學記至若州長蒞民之堂應祀之祠社厲之壇敞久弗治者次第新之規制咸宜人順神和終君之任境內稱

平寧焉撫按使知君才多試之艱劇悉稱任用旌典復得誥命贈君父母妻皆服國榮此又天下守土吏所同願而罕能致者去之日州耆宿楊雄等相扶携爲狀留君於行臺未報乃脫君一靴截馬鞚群號遮道若父母行去其子也於戲民心無難感國寵非難致惟志士陳其力功光乃著其要路不蔽賢公道乃行李君爲隆慶而得於人若此予知民好德之心與上之公道固皆不泯也紀循良以勸善懲惡臣職也是用敘其事而系於辭其辭曰龍門北峙居庸南岫有巖古媿俗近樸淳寥寥名宦屬者孰聞李君秦士賁來自陳敦志率履惟清惟勤兵民譁紛明剖威垣有焚有苛哀益用均授我民犁流返於吻作我儒宮士興於文有翼蒞阡有蕭延慶縣志

卷之九 藝文

一七

接神革毀飭頽觀瞻維新使臣旌勞褒典是伸奏功陟明君則遐臻不借寇留民孰與忻君有嘉政有嚴有恩民心旣銘載勒之珉立之州衢以憲後人

重修眞武廟碑記

江朝宗

北極元天上帝眞武之神其顯應尙矣我朝永樂初年創隆慶州城宣德乙卯郡守楊賓捐俸買地於城內乾地郡民楊孟眞徐永齋出所有助之造神殿塑神像闔郡軍民歲時蠲潔以虔祀事正統己巳兵燹居民驚悸避之其廟宇賊不敢犯景泰庚午郡民復業奉祀如故是廟與草場並列天順庚辰五月六日夜災逢回祿草焚殆盡廟則突兀不動人以火執廟主楊孟眞子宇有司坐以

重法人謂宇不復全其生矣比抵京執法者詢其實而別白之宇
獲免官草亦弗再究與人咸以爲異此固神在天之靈之攸祐也
今年夏奉命守備是城指揮汪君鎔謁廟伏覩神像慨然偕郡守
師宗文各捐己俸率廟主宇修造山門兩廊暨鐘鼓二樓規模制
度煥然一新工始於是年夏而告成於秋尙書兵部員外郎李君
衍郡人也述其事實屬予爲記予沐神之陰祐素矣無以爲報况
重有請而敢靳乎惟神之靈玄深莫測行乎天地統乎陰陽覆而
爲雲澤而爲雨鼓之爲雷霆明之爲日月驅袂殄沴玉成萬物其
廕庇於蒼生者詎得而形容其妙也耶武當山神之修真凝道超
舉昇化之地也朝廷俱勅建宮廟以祀之而神顯靈應言難殫述
延慶縣志

今隆慶年登大有民享厥福非奉神者誠以格之而致爾歟予知
自時而食於隆慶者悉體朝廷奉祀之誠而神之顯應殆與天地
日月相爲悠久云

重修東嶽廟碑記

蘇 乾

隆慶舊有東嶽廟在靖遠門外正統八年州守耀州古君節移於
州治之良隅地則郡民杜仁舍也成化九年州守秦州李君肅重
修其成則義官楊壽之力居多焉自癸巳迄今六十餘載風雨推
剝之餘金碧凋敝棟宇傾頽弗堪棲神乾叔父陽偶有事於祠下
見其壞也愀然於懷乃謀於衆爲興復計於是鳩工庀材以次脩
理腐者新之圯者起之先正殿次寢殿東西廂聖母祠大門次及

梵修之居共計二十三間興於嘉靖丙申年九月十一日成於丁酉十月九日雖基址維舊而規模工程則加於舊過者改觀瞻者起敬起甚盛舉也繼而命乾紀其事乾惟東嶽泰山五嶽之一也五嶽在五方而各神其神於其方者理也泰山在魯魯爲今山東地魯人之事東嶽固宜也隆慶距魯千有餘里其亦祠東嶽者得非以其神之靈無往而不在歟况雨暘之時若焉民物之阜康焉或賴神庇固司牧之所欲然者又作廟之需皆出於民而不費公家之物亦上之所不禁者所以吾民不以越分爲嫌而樂於趨事也於戲民之事神凡以祈福而已人知祈福則必避禍殊不知福所以錫善人非可以苟得禍所以懲惡類非可以倖免也一感一延慶縣志

應其中蓋有幾焉不容以私擬也然世有憤不能伸而質諸神者固以神之正直能察人之私也能鑒人之情也能罰人之惡也既而果有應者要亦神之靈有感而然未可全諉於數也以理而論則福善禍淫者天也天即理也以迹而論則神所以奉天之道者也人知趨善而避惡常若神之在其首上則事神之道又不在於物品之藝矣太甲曰天作孽猶可違自作孽不可活孔子曰敬鬼神而遠之孟子曰禍福無不自己求之者乾恐斯人惑於禍福而不知所以事神之道故以是告之

永寧縣重修學廟記

蘇 乾

爲治之道莫善於教堯命契爲司徒教以人倫此教之所由興也

三代以來設學以教萬世之下罔不因之孔子繼往開來之功實與天地相爲無窮是宜其在在尊崇立廟以祀之自有漢至於今而不廢也我朝永樂甲午建永寧縣於縉山之陽以永寧衛附焉厥後又以隆慶左衛附焉時邊務方殷未遑文教廟學尙未立也正統元年嘗創立然規制卑狹尋復傾圮成化丙申有司者以御史歧陽展公之命重加修拓今嘉靖戊子五十三年矣惟年既久故其傾圮又有甚焉者是年夏四月巡撫大中丞東平劉公按部到縣廟謁之餘佇立環視愀然不寧謂學舍之壞何以棲士朝廷之壞何以安神邑小民貧修復之任當在我於是發贓罰銀若干鎰米若干石委萬全右衛知事杜銳永寧衛指揮康琥永寧縣知

延慶縣志

卷之九 藝文

二〇

縣紳雲龍行修復之事三人者承命惟謹乃市材鳩工卑者廣之缺者補之汙者華之中爲大成殿殿之前爲戟門又其前櫺星門殿與兩門其楹皆四殿之左爲東廡右爲西廡楹二十有三殿之陰爲明倫堂六楹東博文齋西約禮齋堂之後爲教諭廳堂之右爲訓導廳各十三楹西廡坤隅爲神厨學之東隙地爲射圃圃有觀德亭厨並兩齋皆如殿之數東屋之東爲號舍六聯共十有九楹學之門立儒林牌坊一座廟與學繚以高厚之墉以至案桌籩豆之類無不一徹而新之神可以安士有所棲於此見公之用心亦勤矣哉公以甲戌名進士爲進賢尹以戡不軌者有功兩陟而造今階蓋其剛毅恭儉精明淵塞故凡所爲無不就緒此特其餘

事耳是役也成於己丑之冬种侯書來徵乾紀之欲刻石示久遠夫學校之設所以造士廟庭之崇所以敦本實所以振後人企慕之心蓋素王之聖配享之賢初亦吾人也而何以享萬世之祀成闕曰彼丈夫也我丈夫也吾何畏彼哉此古聖賢可學而至也士之游學宮而過廟庭者其能以此自期乎然所謂期聖賢者非謂近世務爲怪異以竊道學之名之謂也必內聖外王之學具全體大用之理該措諸事業而俊偉形諸文章而正大以之用世而無所不宜通而溥明而公直而不迂窮而彌光更有誠敬以主之可法於天下可傳於後世此於聖賢其庶乎出乎此則偏曲而不可用矣士子於此能得其全則固可以輔世長民正紀綱而興禮樂

延慶縣志

卷之九 藝文

二二

若得其半亦不失爲有用之學果若有是則兩衛之武夫亦將有所感發興起而折衝樽俎之具於是乎得矣列公所以興學之意諒在乎此故書付种侯使刻之

重修城樓記

張士科

永寧舊治團山下原無城池自我文皇帝龍飛甲午大巡狩北邊駐蹕獨山鑿茲地東南十五里土壤曠沃群山環峙命武陽侯薛公建城周圍六里高三丈五尺池稱之嘉靖中圯於霖雨楊公大節修增四尺創建麗醮及角樓各四以謹墩望而城始備比來邊塵久靜覆隍漸弛又兼滂沱浸損風沙壅積城垣頽仆而乾方尤甚且四樓丹堊悉成畫墁飛翼羽林之遺藐如也歲上章叅府張

將軍來駐永寧慨然以城池爲軍民保障且四樓毀卑非所以壯國威也乃鳩工聚徒於西城墻之壓仆者極力修葺之所費工不下三千咸區處軍餘人人爭趨城樓及角樓輪奐更新飛櫓蔽堞錡光映池軒翬纈目所費毫不請於官帑各塑神像以爲樓重左文則清河叟右武則壽亭侯而北極居坎位以南向焉視昔之陲侈隳臙者即什伯不啻矣工始告竣走介句不佞以紀余惟易有之王公設險以守國禮曰城池以爲固况邊城所係尤急哉至城樓視睥睨隍塹雖若無與干城者然兵法百樓不攻又墨子云城三十步堦樓百步木樓二百步立樓夫言城守至九却極矣其制如此則樓之不可已也將軍之爲是舉其得易禮之旨而知當務

延慶縣志

卷之九 藝文

一一一

之急哉然將軍之所以爲永寧慮者不惟是一城與樓也夫春秋齊侵蔡而蔡潰晉伐沈而沈潰楚伐莒而莒潰當是時三國彼其城非不高且堅者顧民保於城城亦保於民也將軍之守永寧也修武塲繕犀利撫鞍冢懷曾馘則無形之險自有爲萬里長城者在茲但爲紀修城歲月不多贅云將軍諱國柱號磐石宣鎮人

重修演武廳記

李體嚴

國家嚴九邊以禦敵惟宣鎮東路永寧屏翰京師密邇陵寢去敵穴咫尺尤爲重地設衛所屯堡守操總防等隨在控制而發縱指示總之援兵營叅將聽命焉居常各自爲操練若兩臺大閱及兵憲公巡試率調各路兵馬雲集永寧校秣舊有演武塲居城東里

許泐於章皇帝御極之七年顧基趾湫隘歲月既久榱桶蠹毀赤日溲溲旁風上雨漸及隳隳無論規制陁陁非以樹具瞻而壯國威即羣羽林而教之胡以作三軍之氣也歲庚子上谷張君來守東路已三歷至分矣健兒挾纊狼頭格心君緩帶輕裘盱衡武塲之傾圯者命工鼎新之拓其基易爲楹者五前爲重宇者楹三東西各增鉦人舍者楹六而又樹之棹楔華采軒翔以表三錫之吉所費不貲毫無與帑需請者屹然輪奐之美視舊物迥如也旣落成乃走介徵余言以紀余惟張君之修葺武傷也豈獨爲是侈觀美乎哉蓋嘗披閱諸兵家籍而知君之教民者深也夫地趾擴矣然不曰高陵勿向背北勿逆乎堦扃城矣然不曰馳往馳來左角

延慶縣志

卷之九 藝文

一三三

右角乎楹棟增矣丹雘施而鉦房設矣又不曰任重持難肱股羽翼乎赤莖白羽絳編光耀與夫所謂聞金而怒聞鼓而喜乎三軍之士觸目以興思則君所以訓練武士者當不徒在頤指色授間也工肇於上章薜收迄於重光勾芒鳩材出自樵蘇之軍餘而需費則養廉之美也君諱國柱字君用中外仰君有奠邦偉烈僉以磐石號君宣府之前衛人

永寧令趙君去思碑記

艾穆

去思碑者何碑永寧令也永寧令者何蓋屋趙君也趙君諱爾守字守身本齋其別號云君少穎異負奇氣月旦推先及長受麟經於季父大中丞公歲癸酉魁鄉薦第一人頎然玉立居恒倜儻偉

達慷慨豪俠余以封事忤江陵流播河間滹漳水石樓長楊五柞
得與君聯袂投驪是時君方淬礪吳鉤太阿千霄而余浪迹終南
山中不復譚世事矣無何君因公車以癸未授陽城學博丙戌縮
綬永寧所至廣文潘令之譽膾炙人口後先凡九歷年所而余亦
奉命起草萊入掌問寺君以永寧報政刺史西蜀之蓬州永寧父
老子弟之難去君猶之乎赤子之免慈母於懷焉業已尸而祝之
尤戀戀於君而不忍忘焉於是臚列其惠政走長郎乞碑於余以
余故知君也余曰若屬亦知屬篆鑿石意乎昔燕人祀守布於金
臺晉人碑羊叔於峴山則何以故哉誠思之也若屬思若令即不
磨之澤口碑且載道矣而余復贅之儻亦以永人之思所當重而
延慶縣志

故人之賢不可沒乎永故隸廣寧媯川灣龍之區距邊廷堇堇六
舍蓋邊壤而圉居者先是邊馬南牧軍民彫瘵日肩摩就募道路
使者相望疲命於持戟負戈以故士習器窳諸文物典章汶汶習
習曩令茲土者視爲蘧廬邑用坐困君甫弭節輒廉民間疾苦則
破格興除瞻謁孔廟棟宇周垣傾圯狎豸不治遂捐資鳩工聚財
爲完飾計及登豆簠簋靡匪不具邊鄙青衿椎魯少文則課程而
型範之豐其館穀校其甲乙諸士爲文津津有西京風戊子哀然
登第者相繼崛起他若剏學田修壇壝備義庠平徭役節里長蠲
逋負葺廨舍以慎關防獯懲胥以褫舞文禁梟虜以息奸宄逐倚
市以滌淫俗發盜藪以弭草竊詰偵細以防窺伺刑巫覡以止邪

術達肺石以白冤滯蒸蒸治行固未易以更僕數哉其所砥礪者
介石冰蘖之操始終不渝故請託不行苞苴不入供億舊出編戶
者一切報罷即負汲樵取之夫汰華殆盡旦旦乳哺斤斤拊循而
民用以寧語爲政者樹德君之樹德於永寧者蓋淪且洽矣其君
子之政哉余惟君子之政無樂乎悅人於始而終則無以厭其意
也士民豈惟無思君當邊圉災厲之頃輕徭薄賦與民休息又知
先務之當急興起斯文於是乎士類成功而黎庶歸德卒賴以不
渝也夫君令永而永人苾焉且碑之守蓬而蓬人苾焉行且亦碑
之異日者天子采咏甘棠銓衡表次於君超拜右秩苾且益廣而
循良雅政寧有礱磨時哉行見東巖灣上之碑將與金臺之峴爭
延慶縣志

卷之九 藝文

一五

烈矣其有裨於治道者豈渺小哉然則余之記之者匪徒重永人
之思嘉故人之善也已是爲記

黃公生祠碑記

徐申

永寧屬宣府東路爲陵京肩背至要害也叅府之設舊矣獨未有
功其著保障功自都督始亦有祠其旣去而生有祠自都督始故
未有知而兩膽首刻自余始余時按宣而都督方叅東路戎政有
功云越歲己亥余起田間貳納言都督則儼然授鉞鎮昌三年矣
余在銀臺左署父老王國卿孫明德若而人來言都督自叅戎副
雲中而西也東人業已祠事之迄今十載貞珉闕然唯納言知之
蚤感以辱焉用垂不朽以爲後世之師余惟祠情也祠而乞言文

也建祠於既去有生之日乞言於既祠十年之餘可以徵恩矣因憶按東時雖兩疏薦特窺一班更問其得父老狀則語纏纏不休且曰都督美爲政者三不可及者五將終其凡更僕未悉也路故巖邑延袤五百里敵出入孔道也都督至則謂軍民雜處星散倉卒避入城不便首度遠近築堡成狼烟一起隨地投竄且守且禦敵卒無容足即雞犬倚如長城一美也城東邊地黃土坡樵牧之所聚也敵潛伏竊發不擒其人則褫其衣世爲路患都督則精選材官戍守要道責成步騎巡境四周敵由是不敢西嚮窺視二美也史車二酋驕黠稱最陽名內附陰實外誘坐分其劫而莫之察都督則宣明上旨風示國威令自輸服願受罰牛羊諸畜皆以九

延慶縣志

卷之九 藝文

二六

數敵以九數九九八十一則罰之大者也而後與之賞約之罰由由然得曾和而奸絕三美也大安比妓世爲薊鎮屬夷以渝盟斷賞故由四海治入寇東路震驚都督偵知其有犯陵京意身先士卒策馬行邊以禦其鋒獲其哨探五騎質其三而歸其二喻以義利禍福皆噉指賊散相戒毋生事啓釁卒之東鄙不聳陵京晏如不可及一城故患盜有一夜而數被者國門內且爲淵藪都督廉知其趙三因闕其亡餽其幼女隨檢臥炕中藏無美傅之法於是城中關外人得帖席不可及二城西五里龍灣謾藏誨盜年夜報至都督即率健兒循履跡追及旅次盡縛而收之由是民重爲邪四境無故不可及三上谷文運久否永寧尤厄會趙父以關中榜

元來令一意興學造士而沮於無資都督則引爲己責捐俸治具延學官子弟講業講業一稟於趙父經費有度不煩有司歲以爲常是科己酉兩鎮占兩元合之凡十人東略朱君其一鹿鳴小宴供帳極其精緻蓋寓激勸微權而士益知奮不可及四都督自癸未夏東來歷庚寅春西徙凡八年烽火無烟年穀屢稔人皆曰都督之賜故都督方離東而史車叛服不常歲凶爲害夫然後益知東人不可一日無都督不可及五凡此皆其著者自都督一登車而東人冕衣裳者兜鍪者縫掖者騎步者杖履者提携者自西郭屬之境外擁無跬步隙婦無老幼兒無少長各遮道泣留都督下而慰勞涕霑霑沾衣自近古以來未之前聞也既去東人孺慕不

延慶縣志

卷之九 藝文

二七

置捐貲易西郭龍王廟右四畝爲祠肖像以事堂三楹前監門樓圍以周垣翼以兩廡募僧居守堂後百步許有地四畝萬戶侯陳文謨施僧梵修東南許地十畝軍士劉寶給僧贍奠皆感恩以圖報者經始以己丑秋落成於庚寅夏迄十餘禩而歲時伏臘不懈彌虔東人何嘗一日忘都督哉余曰唯唯今之以戎行顯者往往無所表豎至秦越視其軍民都督叅戎時年纔逾三十距而西且八載藉令喜事而暴施宦成而政怠其何以繫去思咨嗟父老此難以形勢駭也都督悉有衆善豈不卓卓乎哉而又持之以重出之以平有而不居久而勿替此邊疆之福也社稷之功也今奉衣冠陳俎豆而祝之其誰曰不然都督行矣其必以功實陟公孤冠

友置將圖形麟閣勒功鼎彝生祠特其土苴耳余不佞尙相與圖厥終都督姓黃名明臣字翊運彭澤人起家興和所千戶侯吉菴其自號云

重修龍神廟記

李柰

隆慶城北坎地舊有龍王廟三楹崇臺峻基規制整嚴且雜植林木森茂烟籠篆浮誠一方棲神勝地也歲久傾圮弗堪供祀至嘉靖辛丑都憲黃公家器右生者謀衆修葺遂廟貌儼然如故迨癸丑歲陰雨連月弗開致頽敝殊異往昔行路咨嗟無以稱州人禱祀之意戊午歲春初郡耆李景蓁等詣廟惻然乃設醮募貲刻期舉事繪像砌基址凡百可增可補者罔不殫力營治有致仕實齋

延慶縣志

卷之九 藝文

二八

李公喜捨廟東側地長十丈闊一丈二尺又士人楊梅亦捐廟北側地長一十二丈闊七尺餘周圍有垣仍剝屋宇在臺之上與門之側者共七楹以便焚修抵秋將成李君因染症弗克會昔與李君同議舉二事者亦李姓名海恐前功隳廢復僉謀於衆期完工務重門疊級畫棟碧簷煥然改觀矣復訪有行比北鄭玄福住持茲廟朝夕焚掃且修繕有勞至是景蓁之願遂而鄉人之望慰也衆恐歲遠湮沒無傳遂命工鐫石用記顛末而捨資士衆咸勒碑陰以俟後之有志修復者考焉是爲記

延慶守耿公德政碑

陳文燧

今宇內所稱親民吏無若縣令州守其稱難於得民亦無若令與

守而邊郡之守其難視內地百倍之勞頗牧守雲中鴈門日擊牛
饗士與民休息匈奴闖入則急收保有捕敵者罰無赦邊民感激
奮鬪一舉而酋功無算敵不敢近邊牧馬者數十年迄今稱邊守
輒指屈頗牧遂爲稿竹芳我明定鼎燕幽延慶州去居庸關不百
里外捍強邊內拱陵京蓋云谷之襟喉都畿之肩背視漢雲中鴈
門尤爲衝要自成祖犁庭以後互有勝負然迨未大創正統己巳
之變敵酋日猖獗嘉隆間躡擾頻仍虔劉焚掠歲無寧定州治岌
岌不可支矣穆廟覽督臣之請令樞輔集議條奏乃許敵款貢受
封定期市易少解戎禍顧北邊叵測貪噬無厭撫賞稍不當意則
橫肆攫奪甚或攻城砦掠畜產剽子女而要挾之當事者怯於敗

延慶縣志

卷之九 藝文

二一九

盟之說涵忍混貸上諸弁領窺見其隱往往剝城且士爲媚外計
守土之吏非不知軫念民瘼而苦於掣肘補塞暇隙守歲待遷分
事已畢拖火積薪之憂孰不爲慶民免之乃沂水耿公尹灤城有
賢聲轉餉上谷遂遷守茲郡公至即進諸父老詢問閭疾苦旦夕
孜孜爲之興能輕徭薄賦恤孤字嫠墾荒蕪課種植獄情枉抑者
亟爲申理囹圄幾於空虛老賍宿猾爲民蝨蠹必以三尺繩之而
其飲冰茹蘖瀟然寒素不使小民供一蔬果費故廉威公明豪橫
屏跡有神君之號云乙酉夏亢旱不雨公步禱之甘霖隨霑諸郡
惟慶獨稔且完埔濬塹繕堡崇臺與民列屯固守暇則進青衿課
藝旭德使窮邊僻壤得回大雅風戎庶公德受浹髓淪肌輒枕戈

敵愷冀一當以謝公公亦禁不得妄動而黃青諸酋憚公威稜且知其民未易與也堅守要東不敢竊延慶一瓜果而京陵之地安然如堵主上廉公循政錫之誥命尋擢貳延安父老子弟聞公行如失慈母羣數百人叩闕留公不得請飲泣而歸板臥鍵城不令公行復控諸上公爲代疏留上公諭之曰若輩念守非以其政乎有政在未爲無守也士民曰吾儕小人安知計出此於是代石紀德政槩數年善狀一一垂之標示永範使後來者繼紹而爲不朽之業焉嗟嗟今之談吏治者高步黃虞俯視卓魯竟其實非勾棘以立功名則巽懦而糜歲月處之內地民且凜凜而况邊鄙之民哉藉令有邊州之命百計蟬脫足矣安望其表樹若此公之政不

延慶縣志

卷之九 藝文

三〇

炫奇釣詭爲稱而其民安制敵與頗牧挈長則所謂政在力行者詎不信然哉以公之政即守內地無往不直而弓折彈壞九死一生之民德公至深又奚怪其尸而祝禱勒而紀之垂不朽也且主爵者不以公佐腹郡而位陟之延安非謂其長材善政熟路輕車將使延安之民亦如慶民之得所怙恃而公之陟巍躋膺駸駸不可量也昔羊叔子與陸抗對壘各令護守疆境不劫牟奪襄民且爲勒石峴山睹之輒墮淚夫魏吳不過隣敵且使民有去後思公歷窮邊貽民安富而處患漸消歷五年無一敵之警視峴山之碑其思深哉且頗牧未能以功名終而公之緣節吏治多以儒學定見定力善作善成又當在頗牧上矣世謂古今人不相及者何其

視古人太高而自視太卑也燧昔叨巡上谷常憶得良吏爲邊民造福乃今尙文吳生津津談公政且求記之寄慨於昔幸見於今不能不爲邊民喜爲邊吏勸也輒忘其固陋繆爲之記以應吳生之請且慰士民遐思云

申革斗級禁役碑

宋雲霄

直隸延慶州知州宋爲疾苦事蒙欽差整飭懷隆兵備道副使胡案驗蒙巡按直隸監察御史吳批據本道呈蒙本院批據延慶州民人田坤等連名告前事告稱竊照本州邑屬邊僻逼隣敵穴界與懷來永寧延慶境土相攙地土窄狹且多沙瘠薄槩州丁少民窮舊設州堂庫子各里見年街市集頭老人軍儲預備二倉斗級

延慶縣志

卷之九 藝文

三二

老人看監禁卒皆係極重力差均於東南等一十四里人口內編僉派萬歷二十九年間蒙院道憐憫年里見長借辦供應負累州堂庫子經管錢糧賠貽集頭老人置備祭祀鄉飲俱奉裁革議行條鞭稍得寧息尙有軍儲預備二倉老人斗級守支糧料每年伺候查盤終歲供役在官如遇浥瀾虧短賠糧問罪鬻妻賣子變產完官看監禁卒防範獄囚管解審錄殊爲苦累茲蒙天臺興利除害剔弊釐奸一路窮民均霑雨露凡地方利弊軍民疾苦俱許諸人陳告役等謹將疾苦投鳴懇乞本州移會保安永寧二州縣的議比照裁革庫子見年里長等項事例將預備倉斗級老人革去行令戶房吏帶管軍儲倉斗級照依別城堡改於後所軍當看監

禁卒着落民壯輪流貼監原議工食銀兩盡給該吏各軍役民壯領食免僉各里人戶縱有工食不敷寧於槩州丁糧內加增恩垂永久等情蒙批懷隆道查報蒙批署州事經歷魏三顧申稱查得本州先年庫子見年里長集頭老人至萬歷二十九年間蒙巡按崔按臨訪知前情行令改作庫吏今各役具告將軍儲倉斗級仍改軍丁預備倉改戶房帶管禁卒着民壯似惟垂久又蒙巡按吳按臨查閱倉糧目擊節年斗級八十九名革去每名編給工食一十四兩召募壯丁看守倉獄軍儲倉額編四名恐不足再加一名除舊有工食二十八兩八錢外加添工食銀四十一兩二錢原有書識一名登記承辦庶無差遺議照斗級編給工食一十四兩則

延慶縣志

卷之九 藝文

三三一

服役者責有所歸預備倉二名舊有工食二十四兩外加工食二十二兩禁卒四名舊有工食三十二兩外加添工食二十兩以上共一十三名該加添工食銀一百一兩二錢前項工食銀兩槩州里老人等的議丁糧內均派勒碣立於本州大門外永垂不朽

楊公去思碑記

谷文魁

公江右名家筮仕延州以仁政深得民心四載內轉刑部雲南司員外郎軍民因建祠以志不忘先是公治延之三年考最人僉以邊塞遇陽春即欲建祠以血食百世公聞確辭未幾西曹之命下焉民如赤子乍離慈母也者其如思何一日父老人等乞碑於念余曰不佞思公信有在矣爾等之所以思公者可得言乎僉曰公

之仁政淪浹係我懷思者未易枚舉即如葺理饗宮而功倍剏建則思肅稽倉庫而弊蠹潛消則思均徭清地而畫一公平則思緩征減稅而毫芒不加則思節費惜財及蘇行戶而農商悉舒則思思彌盜有方以嚴行保甲思教化有方以講解鄉約思除害有方以懲治網告思發奸有方以禁止投獻思革徵有方以蠲免驢頭思抑勢有方以杜皇庄軍餉常思其能重兵馬常思其能查器械常思其能整詞訟常思其能簡饋送常思其能禁如覩倉塲之修未有不忍其積貯無虞而軍民永賴者觀學校之崇未有不思其養賢育材而文風大振者觀兩陽之祈風霾之禱未有不思其精誠動帝而百穀咸登者觀州城之繕邊工之督未有不思其金城

延慶縣志

卷之九 藝文

三三

延慶辭文廟別生徒記

王時舉

我皇明稽古右文重熙累洽凡薄海內外罔不建學育才以收菁
莪樸棫之化延慶雖界在塞區然密邇畿輔被化尤先故青衿之
士經明而行修者與內地埒余嘉靖丙寅冬以言事觸先帝怒發
爲州之編氓復遣邏卒偵之余即日辭闕出都城止圮寺宿次日
出居庸關則見層巒崒嶽焉疊嶂幘嶮焉奇哉天造之險也又次
日出岔道口則見縉山鞏峙焉媯水縈迴焉美哉帶礪之勝也俄
而守戎張君松以橐鞬迓幕侯陳君憲以戎服迓鄉官李君柰輩
庠生焦得材輩冠裳楚楚俱肅迓於州關之外全驚而釋勒辭曰
節鉞巡方則士庶郊迎公車省俗則父老祇候余擯夫也斯禮不
亦過乎諸生進而對曰不以盛衰易念者君子之行也况公之來

延慶縣志

卷之九 藝文

三四

乃君命耶若夫勢張而鶴蓋成陰迹困而門可羅雀竊嘗鄙之矣
抵州太守程君應登預就舍以待之嗣是諸生朔望必揖歲時必
謁復持所作課業託署篆別駕劉君光岱就余校之余辭曰經術
精通者設帳授徒問學淵涵者生徒立雪余燕之鄙人也何以應
其求耶諸生進而對曰師不必賢於弟子者先儒之說也况公乃
先達耶若夫位卑則足羞官盛則近諛竊嘗詣之矣觀其文雖人
人殊率皆理致宏深藻思炳華余進而語之曰諸生之文不可謂
不工矣且郡之哲科第相望者亦甚重矣何芳躅之久寂乎諸生
復進而對曰學成於勤而荒於嬉教行於富足而阻於貧窮吾州
自己酉以來被敵者八野無青草室如懸磬調遣繁而閭里紛羅

招買多而蓋藏悉匱吾輩救死不贍奚暇治禮義哉余聞而嘆曰
國家建學興才將以康濟斯民乃今民既不能自存士以不能自
振可以觀時矣雖然無恒產而有恒心者惟士爲能古之槩戶蓬
樞不謂之貧肘見踵決不謂之病卒能身顯當時聲施後世今諸
生不以盛衰易念則其見定不以滿假自居則其心虛矧今觀風
諸公咸垂青禮教誠奮其卓然不奪之志則蓄極而章積久而露
出則爲名臣勲業嶙峋於昭代處則爲名士姓名璀璨於汗簡焉
不亦偉乎是則致望諸生之意也若優恤貧商鈔束黠卒則有司
存又奚贅諸生成色動神竦駸駸有邁往之志焉今上御樞百度
維新奉先帝遺詔登起擯棄余濫續貂尾以元春望日行矣詰且
延慶縣志

卷之九 藝文

三五

謁辭

戶部尙書李公神道碑

徐溥

公諱衍字文盛姓李氏其先山東歷城人永樂初有諱義者謫戍
南丹後改編隆慶州民遂籍隆慶是爲公之祖考考諱亨皆以公
貴贈戶部右侍郎公自少穎悟爲州學生有聲塲屋景泰辛未登
進士第授兵部主事歷陞員外郎郎中皆克舉職成化二年陞河
南右叅議檄所部課民種桑棗戶若干株因以考長吏勤惰且月
令條上其他政即善則溫顏慰之即不善則訶譴不少貸由是州
縣之吏罔不知懲勸四年其母夫人憂服除改四川奉勅提督松
潘等處糧儲出見彭索河荒田彌望乃召其土人而問之曰是可

耕地而不耕何也衆所謂生蠻往往擾耕爲患公則相視要害設橋梁墩堡塹柵爲防民乃耕耕遂無擾時彭潘有堡曰張臘茂州有堡曰松溪皆爲生蠻所攻公與叅將姚或前後擒殺數百人蠻乃遠遁捷聞朝廷屢有寶鈔綵幣之賜灌縣江都堰壞歲役四萬人修之吏得蚤緣爲奸公去其十九築不踰歲而功告成民永賴焉七年陞河南右叅政其居官聲實一如叅議時十一年陞江西右布政使未幾陞都察院右副都御史巡撫河南至則剗刮宿弊理冤獄黜賊吏定九等差役法時黃河水溢城浸者已三版公視東南角低下公乃命守工之官日夜疏濬始免決囓之患十六年陞戶部右侍郎尋奉勅巡視山海邊關整飭兵備置床子弩一萬延慶縣志

懼惟恐有犯公者時公不大聲以色事固無不理也二十三年公遽有去志遂上疏乞身以歸買園築室於隆慶城西北日與親舊觴咏其中或問以官事則不應宏治五年以建立皇太子恩進一品職七年十月十一日卒於家年七十有四娶黃氏繼娶梁氏任氏皆贈淑人男四人長曰鶴順天府執事次曰熊州學生次曰鸞曰鳳女四人長適廣德州知州同郡辛禮次適進士山海崔錦其二尙在室孫男女六人公性簡直與人不能委曲又好面折人過雖遇權貴人亦不掩護故權貴人多怨公公將用輒爲其所抑其去也亦以是云銘曰南丹之李派自歷城暨入隆慶李斯有聲李之有聲實始於公才德並茂位秩斯崇公佐三藩至有成績孰爲

延慶縣志

卷之九 藝文

三七

最多西蜀赫赫蜀有土田公爲耕之蜀有寇盜公爲平之蜀民嘻喜惟其所欲公爲蜀民奔走僕僕公撫河南河水瀾瀾浚之導之河乃東馳不震不動公之在邊孰爲強敵而敢噉焉公視饑民哭聲在途裹糧以哺民咸歌乎歲儲浩浩東南之輸公平乎出納不爽錙銖惟公之才已用於時人猶有言不究其施惟公之位已極其至人猶有言不久於事公其已矣爲公慨何刻銘墓隧百世不磨

重修儒學碑記

楊惟相

延慶古上谷首郡山川之秀甲於宣雲而學宮雄勢實踞之故昔士產其間多英彥大司徒建牙觀風使者暨粉署藩臬二千石繩繩相望晚近寂寥者數十載餘說者謂絕盛難繼殊大不然夫五

百年而明世出原未易數然也而大學傳引銘誥曰日日新曰作
新民則延學之弗昌病在襲故哉予蒞延之日先予至者業有修
學議工亦次第鳩集然日玩月愒且圖舊貫稍一補葺以畢故事
予惜其糜工而無當將終不足新人文而昌後學遂取廟貌一鼎
建之次堂廡次祠亭次櫺星次泮橋次號舍官宅無不頓更其故
學之南其異峯焉屹然千仞前爲拓城八丈餘列石欄巍坊以迎
其秀合五龜玉峯之勝排闥而入淪媿水如帶州學緣是一新夫
雲新則瑞山新則靈學新則茂德新則明延諸士能無意乎鯤之
化也搏扶搖而上者九萬里也鳥獸麟甲各自爲形獨龍曰文虎
曰變無亦惟其能自新哉予不佞非敢以以新民自侈日顧新又
延慶縣志

新以追爾先達芳躅彬彬復還其盛是則大學正宗而予重建初
志哉斯役也爲坊者七環墻而丈則百四十有二規制壯麗卓爲
畿輔一巨觀因工於軍因木於邊因石於山惟其因之是以新之
前後越四載而竣官帑民貲即半緡未之損也是爲記

新墾水田碑記

胡思伸

今宇內嗷嗷閭閻貧瘠極矣而邊方爲甚故籌邊者首以開墾爲
急圖誠謂廣儲裕國所必資也不佞受事媿川竊謬有意舉行之
三令五申而民堅不願拂衆難行已無措手矣無何直指見陶吳
公狩上谷按延慶問俗觀風相度地宜喟然嘆曰此地土潤水夷
曷不通渠墾田興利以佐公家乎諭不佞成其議不佞謝如命則

又曰水利所以未盡興者以當事者重科峻法承行無狀因是病民故弗永也不佞唯唯復又曰小民不可與慮始而可與圖成當官必除害乃能興利不佞復唯唯聽命蓋深慶主持有人邊疆之福也已即詳會制撫兩臺俱報可乃命署州事衛幕魏三顧董其役州縣衛俱如議以行延慶一州尤爲泉流之匯稱邊之澤國焉議甫下而小民畏苦如昨逡巡不敢前私計小民趨利如水茲水即利也民何苦而不趨是必有所以病民者細廉其故時三老子弟群跪而進曰吾儕小人亦知上意諄諄以利民也第往年奉上命間亦改旱地爲水田俾稅輸將矣而遺害迄今田仍旱也而稅重如故民柰何復甘蹈之以爲後憂不佞惻然念焉請命于直指

延慶縣志

卷之九 藝文

三九

公公爲慨然出示遠近諭曉諸前所苦重稅許即釐革之自今伊始新闢沃土歲即穰穰槩從地徵立石豎碑永垂定則以藏富閭閻神氣自壯即固圉至計也下民於是踴躍思奮畚插爭先乃率鄉約劉視遠屈尙仁等遍閱屯堡察地分渠溯原水道一因海陀泉澗引至古城濬渠由雙營抵州城一十里墾田五千餘畝水遠郭壕大培地脉一因佛峪泉濬渠數里抵張山營遠至集賢屯墾田一千餘畝一引北山下蔡泉等水東自中羊房西接張山營南沿田宋營上下板橋及吳家營郎家莊小河屯墾田一萬四千餘畝與州接壤懷延二衛地方刁家營墾田四千餘畝通渠之費皆藉資軍夫萬餘工掘侵民地爲渠即給官銀償之匝月間成畦者

徧相望也幾及三萬畝至於地袤曠迂尙未盡闢有待而舉會新任宋守諱雲霄偕管糧杜倅諱齊名各銳意民事留心水利併力督率鼓舞開墾前地所未成者又畝逾三萬復及東紅寺黑龍廟集賢屯花園屯保安新城所轄礮山堡等處皆引水灌溉計田又三萬餘畝沙磧萑葦之奧悉化爲膏腴卽小民且爭相開濬行成錯繡如曹官等堡匪可數計總之皆上心民力有以普成之也頃歲獲稻糧數十萬石暹時米價湧沸自稻田開而斗斛平家給戶足人心安堵遙望東路哇疆不遜江南卽遇旱魃有恃無恐其於禦敵尤善敵故利騎不利步今盡地而溝洫之敵不得長驅是閭井之界皆爲金湯私公兩利莫此爲甚州民始擊壤興歌知上所

延慶縣志

卷之九 藝文

四〇

以利我也於是欲壽石以志不朽而乞言於不佞思頌盛美余謂此直指公之德意兩臺之協成軍民之同心而邊方之厚幸也汪汪千頃樂利無窮予何能仰贊萬一焉姑綴其言若此使後之覽斯碑者洞曙其巔末母深法母重科以有負於上人愛民足國之意及不佞與諸司拮据之勞也於是乎書萬歷四十四年丙辰仲秋月欽差整飭懷隆兵備道山東提刑按察司按察使新安胡思伸書

修南關新城記

韓浚

延慶新城南關成州牧宋君以其狀來曰宣鎮之有延慶也始於永樂中文皇帝駐蹕於此山河四望樂而安之因命尙書趙公狃

建州於沽之東媿之北云其後獨南關成聚烟火廬井埒於中州自是皇華按部使者每駐節焉嘉隆間塞上凡七中敵獨南關無恙彼時所以制敵者土墻猶固媿水爲池耳年來墻圯而媿流淺澗褻裳可涉且州城故遵媿岸以築坤方內縮不無稍缺先是蒞州者計增修而未遑也雲霄守茲土四載每覩之而低徊却顧不能已已會觀察使績溪胡公持憲節鎮懷隆大修邊備乃得以士民議上請報可旣奉規畫矣因而簡材官經費用物土方計徒庸因力於軍因食於糧夙宵奉行惟謹修築磚墻二百丈有奇包絡西河一屯爲敵臺者二角臺者一關門二水門二易土爲石濬媿爲池築壩引諸流衍灌溉溝塍稻畦柳陰森然彌望矣經始於丙

延慶縣志

卷之九 藝文

四一

辰三月告成丁巳之秋不肖一守土吏何能爲役惟是觀察公威靈寔式臨之敢徼惠于名言勒諸貞石志延人之德公也余應之曰唯唯因思宣鎮之重尙矣國初逐敵漠北即元上都設開平衛以戍守宿重兵置八驛東接大寧西連獨石屹若三受降城焉文祖自開平出入三犁邊庭而黃花鎮平遠堡間延袤千餘里草木皆兵王庭空幕至南視北斗而還鼓臥烽恬者垂三百載雖由神武之無敵哉亦以地利強勝而先聲足以奪人也自大寧界虜後開平之守退移獨石八城破而爲土木之變雖以廟社之靈旋幸收復而要害之係重可知已今延慶者乃宣鎮三衝邊之一也兩郡縣輔車相依三衛之士持矛而操闖戟者環侍以爭一旦之命

即以三犁迅掃之盛赫威濯靈尙皇皇於斯城之建今日南關之役可少緩乎哉夫太原城而思明遁統萬固而拓跋遠皆於倉皇之際以幾萬一之功論者猶然蹙之矧乘欸市之暇大修守戰之備觀察公之意念不亦遠乎異日者奉明詔以勒燕然碑黑水非異人任矣州牧庇公字下手口拮据亦既勞止因得并書觀察公諱思仲字君直乙未科進士南直績溪縣人州守諱雲宵字奎光丁酉科舉人山東淄川人

懷隆道胡公學田記

官 史

田以學置義舉也古者制民產計口授田法至備矣子與氏陳王道而繫庠序學校於井田之後又曰卿以下必有圭田田不必置

延慶縣志

卷之九 藝文

四二

之官士自得資之民厥後稅畝行而阡陌起於是民以田相易民失養何以養士士即貴自立乃司教化者可徒責之士坐視其莫之養而不爲之所耶則贍田於今之學急矣且延僻處邊古號儒州先是人文稱盛代不乏人自胡馬南下人罹鋒鏑兼以地瘠賦重士則甘拋筆硯以至外營自匪承席世業僅可筆咩而遊學奔走於衣食之場是以科第寥寥耳今延士占名膠庠者不過百人廩於官者約三十人猶藉歲餼其餘公私無可資者什幾三四非盡無恒心士也恒產缺焉延自設學以來原無學田利賴今廉憲胡公目擊士艱惓惓以造士爲念偶懷來修城掘土得金下檄廣置田以贍延士人謂曠古僅見有功斯文甚大夫士也不自食而

資其養於官人攘爲己利而學田始名且以地方二百餘年未修曠典而今日聿見舉行非士之厚幸哉士旣幸有此藉抑將何以爲學聞學莫先於義利之辨而義固士人之田也誠明乎此而師以義率士以義守則茲田之授名曰賑乏實以磨廉礪介詎云瞻士而由之貞教維風挽世之頹其在斯乎延士叨斯惠自此而振作之科第芬芳人文丕變孰非胡公惠養力哉後之食公之粟景公之德垂千百世而不沒也余以廣文躬逢其舉因弁數言以鐫名公姓胡氏諱思仲號冲寰南直徽州人置民田一頃坐落城西北隅三里許用價一百四兩地糧照地完倉歲入租市斗三十二石一斗給士之貧者謹以遺德用述爲記

延慶縣志

卷之九 藝文

四三

懷隆兵備道題名記

張鎬

國家定鼎燕京西北出居庸而懷隆永治實維後屏也由懷南度橫嶺穿白羊即京師右輔與王帶都陵寢攸宅者相密邇焉嘉靖庚戌之變敵衆從白羊北遁視隆永之紅門諸口及四海冶之南通黃渤者均爲要害予自丙辰歲由分守口北道叅議以待御李有池公建議轉懷隆憲副設險南山團練勇敢責任最重厥命維新乃躬詣南山陟巘降原經營是力即以所請帑銀飭具程材鳩工興衆以岔道當居庸吭背即堡爲城易土以石崇其障帶高其閉閔迤西抵龍爬山迤東盡四海冶皆聯墩山立共二堡之可創易者凡築墩四百六十有七亘高垣墩垣內外長壕限隔晶窖從

橫居常戍役七人秋防警急則各增置百一十人乘垣而守俾者又百十餘人一切五兵礮具咸足備擊刺仍張官置長日夜邏視懷之聯墩列戍視他加密而主以舊墩之列城上者每爇火揚旗列墩嚮應又懼守墩垣者逼於山麓艱得井泉俾之遠汲舍外非計也爰命工鑿井五皆穿至二三百尺水澆出戍者居者咸賴之其爲戰士則購勇敢先得千人能投石超距有董一奎者前忠節遊擊陽之子予器其有食牛氣會請俾率多士一奎果淬礪自効東防西戰所至克捷無何予遷撫臣乃奏薦一奎充遊擊將軍添戰士二千人即去冬在東山廟獲有奇功今春虜自張家口欲進犯畿輔爲聯墩戍者以火器擊之一奎復身先士卒迎戰隆慶斬

延慶縣志

卷之九 藝文

四四

前哨敵百伐其兵謀比秋又有龍虎村之戰斬馘尤多敵衆棄甲抱創而逃人心共快焉此尤近昔事未有者予固不盡紀也夫以敵之入寇勢若奔流梗之以墩垣限之以壕窖梟鷲之將勇悍之士又或負垣以批其吭或揚威以牽其尾敵雖悉衆而至不敵明甚噫嘻險可以待暴客雖謂之金湯可也士可以禦勅敵雖謂之熊羆可也人險稱最戰守相須然後懷隆永治足以當陵寢之後屏而鐘簷不警畿輔晏然帝心其載寧矣達兵機洞邊隱者謂設南山之險增遊奕之兵要之有防護社稷之功不可以語言爭今漸驗矣此則有池公之先智而大司馬默齋許公芳溪江公中丞風泉張公先後勘議題覆功亦居多予則併力以成其志焉耳復

因舊衙拓新之爲懷隆道署旣成不可無記匪以兵憲之設衙署之建自予始爲記也記南山之有險也記懷隆之有兵也險設矣而不時葺治之久或圯塞兵足矣而不時訓練之久或耗弱今繼予者郭龍岡氏能使戍守之法團練之規較若畫一而予始事之心愜矣繼龍岡者復如龍岡之繼予則藩垣益固臣子一念報君衛國之心又將綿綿于不窮斯固作記意也

新建懷延二衛儒學學田碑記

孔貞時

古者寓兵于農教行于養人率孝弟忠信以力田而材官甲冑從此出焉是時學之名不立而人無不學之家猗歟盛矣周衰典禮廢黜士行寢衰吾夫子木鐸鄒魯而振起之治賦足民不出四科

延慶縣志

卷之九 藝文

四五

之外禮義信是好而稼圃無庸豈非學即其田而是蘄是藜者此歟燹燬而後漢立博士五經而秀才異等一時並起然學盛京師而郡縣州衛無定設也歷晉唐而宋學始明備官家以養士爲時務一時得志服官者率募田以資士學若趙崇本之在崇安王鏜之于江陵趙汝鏜之于桐廬皆其最著焉者惜乎宋以積蹙止行江浙山前後無天日也崇本諸公起家郡邑止及民間子弟而衛士不升斗也惟我太祖高皇帝掃邊塵而廓清之雲中上谷陷沒四百餘年者一朝洗濯而衛學與郡州邑次第並設師儒館舍有制歲月廩餼有程其後增附之途漸廣而祖制旣定始有不盡餼之諸生爾懷隆觀察充寰胡公以名進士由司馬曹奉天子璽書

秉憲斯土修垣墉飭刁斗積儲萬石墾荒萬畝爲軍國計至周且
悉又思此不盡餼之諸生周之不勝周也計莫若置田便乃檄所
轄州邑爲諸生田若干時其不足懷延二衛屬公鈴下聲教首訖
則獨捐貲數百金買腴地若干頃班班載籍諸生成德之秦叅軍
霖白學博炳以余粉榆于公丐余言于石以志不朽余惟王者投
戈論道儒者俎豆折衝文武原非歧途乃修文之業在武胄爲尤
昔者管仲相齊爲軌里連鄉之制而選雋車端重耳被廬之蒐亦
惟是敦詩書說禮樂者克將中軍而餘韻所漸至有免胄趨風問
弓承飲不因造次倥偬而以整易暇誰言武略惟事馬上而塹華
絢藻之章非車麟鐵駟之眞武也耶嗚呼噫嘻我知天子建衛學

之意矣腹心干城惟此尅夫將緩急是賴况雲中上谷尤咽喉襟
肘者乎特拔其所謂才子子弟者躬俎豆而勤駿奔正訓之禮以生
共訓之詩以作忠訓之易以明律訓之書以申誓訓之春秋以嚴
分而謹防處爲幼學出爲壯猷所以待之者至矣望之者深矣寧
獨右文也與哉胡公體天子作養之意惠嘉後學者如茲於以養
賢及民因文耀武視崇本諸君寓意固有進焉者彬彬多士列在
澤宮得母有如寧郤諸人聯袂繼起而大光此道者乎雖然語有
之原田每每舍舊從新前所云孝弟忠信與禮與義非諸士之田
也耶力之逢年是爲眞儒苟不能芟蕘蘊崇之使五穀之不如蕘
稗則亦自蕘其田而又豈胡公置田之意哉諸士勉之觀察公名

思伸字君直充寰其別號也乙未進士南直之績溪人計公捐儲積銀一百八十八兩三錢買田濟世地一頃四十畝爲懷延二衛儒學學田此外又捐銀一百四兩五錢買趙得洪等地一頃七畝給延慶州學又捐銀一百四兩五錢買朱言堯等地七十畝四分給保安州學又捐銀一百四兩四錢買劉世選等地七十九畝五分給永寧縣學又捐銀一百四兩七錢買地七十九畝給保安衛學各爲學田歲令照數收租以備周急之需將垂永久焉是役也樂襄斯美著有成勞則東路管糧運副杜公齊名也仰體德意祇遵經理則儒學訓導白君炳懷來衛經歷秦君霖也應並書以誌之

